

# Sambuyá den herensia di Kòrsou



# E barku noufragá 'Alphen' i arkeologia summarino di Kòrsou

## Kontenido di guia di lès pa Enseñansa Sekundario

Lès 1. Kon e fragata Alphen a bira un barku noufragá

Lès 2. Fragata Alphen: un barku di bela di palu ku hopi tripulashon

Lès 3. Arkeologia summarino: buskamentu di Kòrsou su barku noufragá mas konosí

Lès 4. Ekskurshon pa Museo Marítimo Kòrsou

Literatura

Kolofon

Responsabilisashon




United Nations  
Educational, Scientific and  
Cultural Organization

# E barku noufragá 'Alphen' i arkeologia supmarino di Kòrsou

## Lès 1. Kon e fragata Alphen a bira un barku noufragá

### Meta di siña

- ◆ Bo konosé historia di e eksploshon di fragata Alphen den bahia di Santa Ana na 1778.
- ◆ Bo sa kiko a pone e fragata eksplotá.
- ◆ Bo sa ku fragata Alphen ta e barku noufragá mas konosí di Kòrsou.



### Konsepto

#### barku noufragá

Barku bieu i kibrá. Hopi biaha restunan di e barku a senk.

#### herensia kultural


Herensia kultural ta formá pa un grupo di hende. Den kurso di hopi siglo nan a desaroyá un propio estilo di biba den un sierio region. E manera di biba akí ta laga un herensia atras pa e próksimo generashon. Aki bo por pensa riba idioma, muzik, arte i baile, pero tambe riba e preferensia pa kuminda, manera di traha kas, transporte, etc.

#### (ra) palu duars

Palu rondó ku ta pegá duars na un masto. Na e palu akí e belanan ta mará.

#### dèk intermedio

E dèk kaminda e parti mas grandi di e tripulashon di barku na bordo tabata drumi i kome. E dèk intermedio tabata keda entre e bodega ku e provishonnan i e dèk di artiero ku e kayonnan.



#### korsario

Un korsario tabata un kapitan di laman ku tabata ataká otro barku i kolonia ku pèrmit di su gobièrnu. Barku i kolonia di paisnan ku su pais tabata den guera kuné. E mester a tene su mes na regla sí i tabata kontrol'è tambe. Un pirata tabata hasi e mesun trabou, pero e tabata hòrta pa su propio ganashi, no pa su pais.

#### saludo

Homenahe ku ún òf mas tiru di kayon, tirá pa un barku ku ta drenta haf.

#### artiero

E persona responsabel pa e armanan i e pòlbu na bordo di un barku.

#### sekretario

E persona na bordo ku ta skirbi relato di e biahe riba laman.

#### pòlbu

Pòlbu pa kayon i arma di kandela. E pòlbu akí ta un meskla eksplosivo di salpeter mulá, karbon i suafel.

#### timon

Ta stür e barku ku e timon den awa. E timon ta trahá di tabla di palu fuerte. E ta pegá ku skarnir parti patras di e barku. Si bo bira e stür riba banda patras di e barku, e timon den awa ta move bai na man robes òf na man drechi.

#### motin

Lantamentu di e tripulashon di barku kontra e kapitan/komandantenan na bordo. Por ehèmpel pa motibu ku no tin fin di paga nan salario.

#### keintamentu

Dor di kombinashon di kayente ku humedad por surgi kandela. Por ehèmpel den un kamber di provishon ku bela, pero tambe den un mownton di yerba seku.

#### diario di nabegashon

Durante e biahe riba laman ta skirbi e desishon- i susesonan na bordo den e diario di nabegashon.

 E guia di lès akí ta trata **restunan di e fragata Alphen**. Pero kiko un fragata ta realmente?



Barku di katibu?



Barku di guera bieu?



Barku di marina?

**Djis pa sa:** Un barku fragata no ta un barku di katibu. For di siglo 18 a konstrui e barku fragata como un barku di guera rápido. E tempu ei tur barku tabata barku di bela di palu. Ke men bérdat, un fragata parse un barku di katibu. Ta usa e nòmber 'fragata' te ainda pa barku di marina moderno. Maske e barkunan bieu i nobo ta bista totalmente diferente!

## E fragata Alphen

E fragata Alphen no ta drif den haf di Kòrsou. T'asina ku e barku no ta eksistí mas pa kasi 250 aña kaba! Tòg e ta un barku hopi konosí na Kòrsou. E fragata hasta ta pertenesé na e herensia kultural di Kòrsou! Of mihó bisá, **e barku noufragá Alphen!** Pasobra **for di 1778 restunan di e barku ta drumí den fondo di bahia Santa Anta**. Den e aña ei e barku a eksplotá ku un klap asina enorme ku a skuch'é te na Boneiru i Aruba! Kon eseí por a sosodé, Albertus Immink, un mucha hòmber ku a eksperensiá tur kos e mes, ta konta boso.



Kiko **herensia kultural** ta nifiká realmente?



Barku fragata mará na anker

## "Kon e fragata Alphen a bira un barku noufragá"

Ta trempan den mainta di 15 di sèptèmber 1778. Un bientu suave ta pone un kabuya lòs dal kontra e **palu duars (ra)**. Tek. Tek. Albertus Immink ta wak ariba. Di unda e zonido ei ta bini? Tek. Tek.

Aya! E kabuya ta mara e bela huntu lorá na e palu duars grandi. Un matros a hasi kos di slòns, Albertus ta konkluí. El a laga un pida kabuya largu keda kologá bai bin. Awèl, ta sigur ku no ta ami sí! Ainda e no tin mag di hasi trabounan importante asina na bordo di fragata Alphen. Pasobra fragata Alphen no ta kualke barku. Ta un barku di guera! Tin reglanan hopi estriktó na bordo. Ku su 12 año Albertus ta un di e mucha hòmbernan di mas hóben na bordo. Por lo pronto e tin mag di hasi trabounan simpel so. Manera por ehèmpel warda riba dòkter Capriles. Kapitan Baron Van Der Feltz, bas di e barku, no tabata sinti su kurpa muchu bon mainta. P'esei el a manda buska dòkter Capriles pa bini riba e barku. Albertus tin mei ora pará ta warda kaba, pasobra e tin ku anunsiá yegada di e dòkter. Anto te ainda no tin niun yola ta bini den su direkshon! E kapitan lo mester ta rabiá ku tantu retraso. Awor lo e yega lat na su sita ku gobernadó di Kòrsou, señor Rodier! Nan lo a desayuná huntu den Fort Amsterdam.

Desayuno! Albertus tin un hamber, no! Bou di dje e ta tende zonido di un 200 hòmber asina riba e **dèk intermedio**. E ta tende e hòmbernan papia i kana bai bin. Nèt nan a kuminsá ku desayuno. Albertus no tin nodi di ta aserka mes pa sa ta kiko nan ta sintá ta kome. Puspas kayente. Desayuno semper ta meskos. I semper muchu tiki, e ta pensa

murmurando.

Albertus ta tira un bista riba e bahia. Tin hopi boto chikitu den awa. Hende lokal ta nabegá rònt ku bérdua i piská. Nan ta purba bende nan ku e barkunan. Ku Alphen tambe. Un ponchi tambe ta nabegá pasa ku kuater hende aden. Nan ta krusa bai na otro banda di e bahia. Ansioso Albertus ta sigui e ponchi. Mara e tabata sintá den e boto ei! Seis siman e tin kaba na Kòrsou i tur e tempu ei e no a bai Otrobanda ni ún biahá! Nunka e no tin mag di baha for di e barku tampoko! Si, pa bai ku nan den yola so, bai yena e barínan di awa riba e plantashinan ...

Albertus ta suspirá. Atrobe e ta wak den direkshon di Willemstad. Unda dòkter Capriles ta keda antó! Algun barku ta blòkia su bista. Na man robes i na man drechi di Alphen tin barku grandi mará. Parti dilanti di e barkunan ta mará ku kabuya diki na palunan fuerte. E palunan ei ta pará riba Kleine i Grote Klip di Scharloo. Ku dos anker fuerte ta tene parti patras di e barku na su lugá den e bahia. Asina por trèk Alphen lihé bai patras, duars den e bahia. E or'ei e kayonnan na bordo mesora ta dirigí pa laman. Pasobra bo no sa nunka ki ora piratanan ke kometé un atake!

Pégá ku Alphen un barku ingles nèt ta tira anker. General Morris e barku yama. Ta un **barku korsario** ingles. E barku a kaba di drenta haf. Albertus ta mira kon e tripulashon ta kargando algun kayon chikitu. Djis akí nan ta bai duna un **saludo**. Ku e tirunan di kayon nan ta anunsiá nan yegada den haf. Delantá Albertus ta hinka dede den orea.

BAM!! BAM!! BAM!! Ta un boroto di otro mundu!

Semper Albertus su kurpa ta kue rel ora un otro barku duna su tirunan di saludo asina serka di su barku. Kòrda ku ta un trampa di e korsario ingles, no! Final di kuenta Repùblika hulandes i Inglatera kada ratu ta den guera ku otro! E korsario por tira ku bala di bérdat pa e saludo i no ku pròp di palu! Ainda dòkter Capriles no ta na bista. Albertus ta bira su kurpa fadá. Di lèn kontra e riel e ta wak e proa/kabes di boto awor. Ei Albertus ta mira **e artiero** Aren ta kana riba dèk bini den su direkshon. Albertus ta hañ' é un hòmber mashá fèrfelu! Aren ta pleita ku tur hende, henter e biahe. Anto awor ta sospechá e artiero di ladronisia tambe! For di e momentu ei Aren ta furioso di bérde. Largu bai e ta grita ku e lo tuma vengansa! Awor tambe e artiero ta wak rabiá. E ta kana bai na e trapi ku ta bai na e dèk intermedio. Eibou e tripulashon ta sintá ta desayuná ainda. Pero ta kos bon Albertus ta mira? Ta un sigá Aren ta humando? Pero ta estriktamente prohibí pa bai abou ku kandela! Pasobra abou den e barku ta warda tur **pòlbu** pa e kayonnan. Un chispa i ayó koroto! Tur kos ta eksplotá! Aren mester sa mihó, tòg? Trabou di un artiero ta hustamente kuida e kamber di pòlbu!

Albertus tambe ta kana bai na e trapi ku ta bai e dèk intermedio. E ke por mira artiero Aren mihó. E artiero ta drük ta papia su so. Ya e ta na mitar di e trapi ta bai abou. Aren ta zuai rabiá ku su moketa. Awor Albertus sa sigur, bérdat e ta mira e punta lumbrante di un sigá den e moketa ei!

'Artiero Abel! Bo no tin mag di bai ku kandela abou!'

Albertus ta grita. E ta kore baha e trapi, bai tras di Aren. E artiero ta bira mira Albertus. Esta rabiá e ta!

'De dònder, awe nos tur ta bai desayuná den shelu!' Aren ta grita. Kaba e ta dobla skina i disparsé. Pero eseí ta direkshon di e kamber di pòlbu abou den parti patras di e barku! Ku un sigá sendé! Aren a bira loko di bérdat!

No por pèrdè niun sekònde mas! Albertus ta mira e porta den e parti patras di e barku pará habrí. E ta kore drenta. Den e kamber sekretario Pilander ta sintá na mesa. Ku su pluma di gans e ta skirbi den e **diario di nabegashon** di Alphen.

'Sekretario, warda bo kurpa. E barku ta bai eksplotá!' Albertus ta grita. Pilander ta miré asombrá. 'Kiko! Kiko bo ta papia ei?'

Pero Albertus no ta haña chèns di splika mas aleu. Un klap duru ta zona bou di nan. E barku ta sakudí i tur kaminda ta zona krakmentu i tintin. Gritunan di spantu i doló ta zona for di e dèk intermedio. 'E barku ta eksplotá!'

Albertus no ta pensa ni un sekònde. Pasobra ku 6000 liber di pòlbu na bordo e kos akí no por kaba bon! E klap akí no ta nada! E ta kore duru bai na e bentananan habrí den e parti patras di e barku. E bentananan tur dos ta hanchu habrí pa laga airu pasa. Sekretario Pilander ta kore bai na e otro bentana kaba. Ku un dùik nan ta resultá banda di otro den awa. E or'ei ...



Fragata Alphen ta eksplotá den haf di Kòrsou

Albertus ta sinti un gòlpi enorme pasa duars dor di awa. E ta dal e manera un sla di mukel! E ta drai rònt den e olanan haltu i rabiá ku a surgi dor di e eksploshon! Un momentu e ta bou di awa, kaba e ta riba awa atrobe. Atrobe un ola ta trèk e bou di awa! Albertus no sa mas si e ta bai abou òf bini ariba! E or'ei e ta dal kontra algu duru. Ta e timon di Alphen! E mester purba kue e timon tene!

E ta saka su man, pero un ola ta bolbe hal'é. Tur ku tin e ta landa bai e timon bék. Pero e olanan ta asina brutu! Atrobe e ta bai bou di awa. I atrobe Albertus ta lucha bini ariba. Ata e timon ei atrobe! E ta mira un hende kologá na e timon. Ta sekretario Pilaster! E sekretario tambe ta mir'é. E ta saka su

pia pa Albertus tene na dje. Albertus ta landa un sla mas i kue e pia tene. Ku tur su furia e ta tene na e sekretario. Un ratu despues e mes por kue e timon tene.

Albertus ta purba kue rosea. Pero e ta hala huma so aden! Bou di tosamentu e ta tene duru. E no ta mira un man dilanti di su wowonan. Tur kaminda tin huma, tur kaminda tin kandela! Mei ora largu Albertus i Pilaster ta pega na e timon. Porfin un yola ta bin skapa nan. Esta kontentu nan ta ora hisa nan na bordo! Nan ta piki dos hòmber mas bibu for di den awa. Pero e hòmbernan akí ta yen di kemadura. Mas aleu Albertus ta mira kurpa morto so, unda ku e mira. Den awa. Riba e restunan di

Alphen. E ta mira hasta pidanan di e barku i di kurpa riba e kasnan!


Mira kon otro Willemstad ta bista awor. Panchi di dak a bula bai for di e daknan. Bentana- i portanan a bula kibra! Hendenan ta kana ròn desesperá. Hopi di nan a sufri herida dor di fragmentonan di e barku ku a bula bai. Den haf tin barku ku a senk. Otro barkunan hasta a resultá bentá riba waf!

Di Alphen ta e parti patras ku e timon so ta sali riba awa. Ainda tin vlam di kandela grandi ta sali for di e restunan. Pidanan di masta, bela i kabuya ta drif ròn di dje. Fuera di ese henter e barku a bai! Kon por ta ku el a sobrebibí e kos akí!

### Tarea 1.

Traha huntu un ret di palabra tokante loke bo sa awor di eksploshon di e fragata Alphen.

Kompletá e ret di palabra tokante eksploshon di Alphen ku loke bo ta haña sa mas di e eksploshon.




## Kousa di e eksploshon

### Teoria 1: Intenshonalmente?


E kuenta ku bo a lesa, no ta un kuenta di fantasia. **E mucha di bordo Albertus Immink a eksistí di bérdat!** Nos a usa su deklarashonnan literalmente den nos kuenta. Artiero Aren a kousa e eksploshon. El a sende e pòlbu ku su sigá. E promé eksploshon mester a tuma lugá nèt pafó di e kamber di pòlbu. Un ratu despues e kandela a alkansá e kamber di pòlbu ku 6000 liber di pòlbu. Ei e di dos eksploshon gigantesko a tuma lugá. Tòg outoridatnan na Kòrsou no a skirbi e mal intenshon akí! Dikon nos no sa. Podisé nan no kier a atmití ku tabatin un **motin** na bordo? Pasobra motin tabata daña bon nòmber di e kapitan i WIC!

Na Hulanda WIC sí tabata bon kla.  
Den nan bukinan anual tin pará ku  
'e eksploshon tabata kousá pa  
malu pa e artiero'.



### Teoria 2: Kandela dor di keintamentu?

Outoridatnan di Kòrsou a bisa ku podisé ta **keintamentu den e depósito di bela** a kousa e kandela.



### Teoria 3: Tirá pa un korsario ingles?

Poblashon di Willemstad a pensa ku e **tirunan di saludo di e barku korsario ingles** a alkansá Alphen. Pa saludo un kayon tabata tira un pròp di palu. Ku eseí e barku no solamente tabata saludá e isla. Na mes momentu e tabata limpia su kayonnan!

E or'ei mester a mira i  
hole huma promé!  
Ademas e belanan i e kamber  
di pòlbu no tabata den besindario  
di otro mes!

E bala di kayon akí lo mester a  
penetrá un par di muraya di palu diki.  
Un bala di kayon chikitu asina no  
por hasi un kos asin'ei mes!





Forsa destruktivo di e eksploshon

**Djis pa sa:** Dòkter Capriles den e kuenta tambe a eksistí di bèrdat. El a sobrebibí e eksploshon como ku el a yega lat pa su sita ku e kapitan! Parse ku e kier a kaba di bebe su kòfi (muchu) kayente promé. Te ainda sa bisa hende ku tin purá: 'Kòrda riba e kòfi di dòkter Capriles!' Ku otro palabra, tuma bo tempu, pasobra yega lat ta salba bo bida!

## Bo ke sa mas?



Na Biblioteka Mongui Maduro i na NAAM bo por mira e buki ku Wil Nagelkerken a skirbi tokante e eksploshon di Alphen: *'De Noodlottige Geschiedenis van het Hollandse fregat Alphen'*.



Jack Schellekens tambe ta konta tokante Alphen den su buki *'De Rijke geschiedenis van Curaçao. De zee, handel en scheepvaart'*. Bo ta haña e buki den Museo Marítimo Kòrsou i den Biblioteka Mongui Maduro.

## Tarea 1.

Skirbi, manera un reportero, un artíkulo pa un korant di 1778.

Den e ret di palabra a kolekshoná hopi echo tokante e eksploshon di Alphen. Hasi manera bo ta un reportero di 1778!

- ◆ Ku tim di dos bo ta skirbi un artíkulo pa un korant lokal. Bo mes tin mag di skohe si bo ta traha pa un korant serio òf pa un korant di redashi.
- ◆ Usa e echonan for di e ret di palabra.
- ◆ Bo por deskribí entrevista ku testigu. E or'ei bo ta usa punto dòbel i komia. Ibertus a bisa: “...”.
- ◆ Un artíkulo pa korant naturalmente mester ta skirbí sin fout!

## Tarea 2.

**Eksploshon di e fragata Alphen.**

Bo a mira dos kuadro di eksploshon di e fragata Alphen.

- ◆ Bo mes traha un kuadro òf un kuenta di strep awor di eksploshon di e fragata Alphen.

## Lès 2. Fragata Alphen: un barku di bela di palu ku hopi tripulashon

### Meta di siña

- ◆ Bo sa kon e fragata Alphen tabata.
- ◆ Bo ta tende kiko e tripulashon na bordo di fragata Alphen tabata hasi.
- ◆ Bo ta siña kon e bida na bordo di Alphen tabata.



### Konsepto

#### bataya naval

Bataya riba laman, bringá ku barku.

#### balki di kil

Balki diki ku ta forma bòm di e barku. E balki di kil ta determiná largura di e barku.

#### kinichi

E balkinan ku ta pone duars riba e balki di kil. E kinichinan ta determiná hanchura di e barku.

#### konstrukshon di kabuya (want)

E konstrukshon di kabuya ku ta tene un masta di barku pará stret. Via e konstrukshon ei e tripulashon por subi bai na e belanan.

#### obra di kabuya

Nòmber kolektivo pa tur bela i konstrukshon di kabuya ku ta nesesario pa laga un barku nabegá.

#### bakbort

Na bo man robes si bo ta para mira kabes di e boto.

#### stürbort

Na bo man drechi si bo ta para mira kabes di e boto.

#### figura di proa

E figura di proa ta situá te dilanti di un barku. E figura di proa hopi biaha tin forma di un muhé òf un leon. E ta kòrtá for di palu i di fèrf ku kolónan bibu.

#### liña di awa

E rant kaminda e awa ta yega riba e bandanan/murayanan di barku.

#### dèk di artieria

Un dèk ta un flur riba un barku. Riba un barku por tin mas dèk riba otro. Riba e dèk di artieria tabata pone (mayoria) kayon.

#### nabegashon


Determiná ruta di e barku pa e lugá di destinashon.

#### reklutá

Konvensé un hende pa drenta servisio riba un barku.

## E barku noufragá mas konosí di Kòrsou

Alphen i su eksploshon ta konosí serka hopi hende na Kòrsou i pafó di Kòrsou. Alphen ta e **barku noufragá mas konosí di Kòrsou!** Wil Nagelkerken tambe a tende di Alphen. E tabata sa mesora ku e kier a **haña e barku noufragá bék** den fondo di laman! El a lesa tur kos tokante fragatanan di siglo 18. Pasobra si bo ta buska un fragata den fondo di laman, naturalmente bo mester sa sí kiko bo ta buska! El a papia ku trahadónan di barku, buska den archivonan i studia kuadronan bieu. Añanan despues el a **skirbi un buki diki** tokante tur kos ku el a deskubrí di Alphen. Den e siguiente lès bo ta tende mas tokante su ekavashon di Alphen!



E buki di Wil Nagelkerken tokante e fragata Alphen



Un fragata moderno bo ta rekonesé na e 'F' ku un number riba e proa

## Un barku di guera

**Un fragata ta un barku di guera.** Te ainda marina ta usa e nòmber 'fragata'! E fragata di nos kuenta tabata un barku di bela di palu. A konstruí Alphen **entre 1763 i 1765 na Amsterdam**, Hulanda. E tempu ei ainda e pais ei tabata yama Republiek der Verenigde Nederlanden. E barku di guera Alphen mester tabata mustra similar.




Bisa kiko ta tur e kosnan ku bo ta mira na e fragata akí!

## Kon tabata konstruí un fragata?

E fragata Alphen tabata ún di **e promé barkunan** ku a konstruí ku un **mapa di konstrukshon**. Promé ku e tempu ei tabata konstruí barku segun konosementu di un konstruktor di barku eksperensiá. Tabata algu mashá sabí naturalmente. Pero e desventaha tabata ku no ta tur barku ta logra sali bon!

Konstrukshon di un barku semper ta kuminsá ku ponementu di **balki di kil**. Duars riba dje ta bini e **kinichinan**. Awor e barku parse un kashi di repchi! Seguidamente e barku ta haña un kueru di tabla. Ta pone e mastanan. E **konstrukshon di kabuya** ta tene kada masta pará stret. Finalmente ta kaba di klabas e barku parti paden i ta ekip'é ku tur **obra di kabuya**.

 Bon mirá e mapa di konstrukshon akí ta konsistí di tres pintura. Den cada pintura a hasi e balki di kil oraño. Bo por pùzel hinka e barku den otro?



E mapa di konstrukshon di fragata Alphen

**Djis pa sa:** Alphen tabata 39 meter largu, 10 meter hanchu i 12 meter haltu. Tabata dura mas ku **dos aña** pa konstruí un barku manera Alphen!

## Yagdó rápido!


Tabata usa fragata pa bringa **guera riba laman**. Tambe nan tabata **protehá** barkunan komersial **kontra pirata i korsario**. Pues, un fragata mester tabata un **barku di bela rápido**: fásil pa bira, no muchu grandi i ku basta un par di kayon na bordo naturalmente!

## Bataya naval!


Den Museo Marítimo Kòrsou bo ta haña prenchi di K.F. Bendorp. Nan ta laga mira kon un fragata i un barku komersial (hoekerschip) **ta hiba un bataya naval dilanti di kosta di Kòrsou!**



E barku komersial di Kòrsou ta nabegá ta bini. E kayonnan ta punta pafó kaba dor di e bentanitanan. Turesten desenanan di matros ta okupá ku e belanan mas ariba.



Aki bo ta mira e fragata drumí dilanti. Tur dos barku ta purba tira bora otro i alkansá e masta- i e belanan. Pasobra si e barku no por sigui nabegá, bo a gan'é!




E barku komersial a kore ku e fragata. Pero e daño na tur dos barku ta grandi!

## Paden di un barku fragata

Un barku di guera naturalmente tabatin hopi **kayon i bala di kayon** na bordo. E tripulashon tabata konsistí di **227 kabes** i tabata keda **lunanan largu** riba e barku. Pa e motibu ei tabatin **provision grandi di kuminda i awa** na bordo. Unda tur e kosnan ei ta keda riba e barku di bela ei? Nos ta tira un bista den un fragata di siglo 18!

## Kamber di pòlbu

E kamber di pòlbu tabata situá te abou den parti patras di e **barku**. Pues e tabata keda bou di **e liña di awa**. E bandanan di e parti patras di e barku ademas tabata fortalesé ku èkstra tabla i kinichi. Dor di ese tabata mashá difísil pa alkansá e kamber di pòlbu ku un bala di kayon!



## Espasio pa kayon

E **kayonnan** tabata para dos dèk mas haltu riba e **dèk di artieria**: 13 kayon na **bakbort** i 13 kayon na **stürbort**. Te ariba den e barku tabatin 10 kayon mas chikitu mas, partí riba parti patras i kabes di e barku.

## Espasio pa provision di kuminda

Pa e biahenan largu di laman tabata bai ku **hopi alimento seku i ku no ta daña, den barí**. Esakinan tabata wardá huntu ku **barínan ku awa di bebe** den bodega abou den e barku.

Si bo wak e pintura di fragata Lutine bon un biaha mas, bo ta mira un espasio pa drumi ku hamaka i tambe un kamber shik. Tambe bo por mira e wea pará riba un roster den kushina. Bo a haña nan kaba?

## Drumi

Den e espasio ku a sobra mester a haña **lugá di drumi i traha** "so ainda" pa 227 miembro di tripulashon! I naturalmente un kushina i un tualèt!

E kapitan i otro hòmbernan importante naturalmente ke tabatin un kamber shik pa nan mes. Nan kambernan tabata situá tras di e masta grandi. Pero e tripulashon komun tabata drumi di pak riba otro riba e dèk intermedio òf hasta pafó.

## Kushina i tualèt

E **kushina** nan ta yama **kombuis** na bordo. Tabata un hòki chikitu. Tògta eiden mester a kushiná kuminda pa tur e hòmbernan ei! E hòmbernan importante tabata haña kuminda muchu mas mihó ku e tripulashon komun. Tambe nan tabata ke un propio tualèt patras den e barku. Tur e otro hòmbernan mester a kompartí ún tualèt! E tualèt akí **tabata den e galeon dilanti riba e barku, skondé tras di e figura di proa**. Ke men e tualèt tabata banda pafó di e barku! E tualèt tabata un kaha di pupu simpel riba un roster. Asina pupu ku pishi tabata bai laman mesora. E awa ku ta spat bin haltu tabata laba parti dilanti di e barku hasi limpi atrobe!



E figura di proa dilanti riba e galeon riba e réplika 'De Amsterdam'



E tualèt riba e galeon di e réplika di 'De Batavia'



Un barku krusero moderno 'Silver Spirit' (196 meter largu!) i e barku di bela 'Alexander von Humboldt II' (65 meter) na Kòrsou

## 227 hòmber tin mester pa nabegá un barku?

Bo a tende kaba ku tabatin 227 hòmber na bordo. Alphen no tabata ni 40 meter largu. Esei no ta asina grandi. Kompará Alphen un biaha asina ku un barku krusero den haf!

Awèl kiko tur e hòmbernan ei ta hasi na bordo antó?

**Djis pa sa:** Alphen tabatin hòmber so na bordo. Te den siglo 20 tabata pèrmití hende muhé biaha huntu como pasahero, no mas. For di 1980 ta pèrmití hende muhé traha riba barku di marina hulandes. Ta for di 2017 numa Kuerpo di Marina ta habrí pa hende muhé!

## Man na obra!

Wil Nagelkerken a haña lista ku nòmber, fishi i hasta e salarionan mensual di e 227 hòmber den archivonan. Dor di eseis nos sa ku **mayoria hòmber tabata traha como matros**. Mas ku 146! Nan mester a hasi **tur e trabou duru na bordo**: for di lora anker trese aden, hisa bela te frega dèk. Pero e matrosnan mester a partisipá na bataya tambe. I den region di Karibe tabata **pèstá** di pirata i korsario!



Bo sa ainda kiko ta e diferensia entre un pirata i un korsario?

## Tripulashon di barku

**Kapitan Baron van der Feltz tabata e hòmber mas importante na bordo.** E tabatin **mando supremo** i su kièr tabata lei! Dos lùitentan tabata guia batayanan riba laman. Asina tabatin mas rango militar. Soldánan tabatin e rango di mas abou na bordo. Mas abou ainda ku e matrosnan!

Pa nabegashon di e barku e kapitan tabata asistí pa dos **skeper** i kuater **timonero**. Mas aleu tabatin un **botsman**, **karpinté** i un **drechadó di bela**. Nan tabata hasi reparashon na kaminda. E **skibidónan** mester a mantené e diario di **nabegashon**. Esei tabata por ehèmpel trabou di sekretario Pilander ku a bula na tempu for di bordo.

**Djis pa sa:** Tabata **rekrutá matros** bou di e gruponan di poblashon di mas pober i hopi baha tambe for di orfanatonan di Nort-Europa. Pasobra kasi niun hende no kier a hasi e trabou pisá i peligroso akí!

## Disiplina na bordo

Ku tur e nabegantenan fuerte i brutu na bordo, e **disiplina tabata super severo**. Sigur riba un barku di guera ku tantu kayon i pòlbu na bordo! **Un provoost** mester a mantené òrdú. Pa algun di e **kastigunan** tabata usa e barku mes. Esnan mas konosí ta 'ra vallen' (kai for di ra) i 'kielhalen' (hala pasa bou di kil di barku). Ku **ra vallen** tabata hasi bo pisá ku piedra promé, kaba laga bo plöns den

awa na un kabuya. For di e palu duars te ariba ayá! Tabata hisa bo na laira un par di baha, laga bo bai atrobe. Dje tantu baha ei, te ora e *provoost* haña ku bo a siña bo lès. Meskos tabata sosodé ku **kielhalen**, pero ademas tabata trèk bo ku kabuya pasa bou di kil di e barku!



Kielhalen (hala pasa bou di kil di barku)

## Bo ke sa mas?



Bo ta mira bo mes traha na bordo di un fragata moderno? Por! Personal di barku, téknika, ict, defensa: meskos ku ántes bo ta haña tur sorto di fishi na bordo di un fragata! Pa mas informashon bo por wak por ehèmpel riba e wèpsait di 'Werken bij defensie' Buska ku 'krijgsmacht delen' i 'marine'.



Riba e wèpsait di e programa hubenil hulandes '*Het Klokhuis*' bo ta haña video informativo tokante bida na bordo di un barku di bela den siglo 17 i 18. Buska ku 'VOC'.



Den e buki di Wil Nagelkerken '*De Noodlottige Geschiedenis van het Hollandse fregat Alphen*' bo ta haña hopi informashon tokante konstrukshon di e fragata i tripulashon. Bo por lesa e buki na Biblioteka Mongui Maduro i na NAAM.



E buki akí ta spesialmente skirbi pa mucha. "*Het VOC-schip De Halve Maan*" di Bas van Lier i Jan Braamhorst (1996). Akiden bo ta lesa i mira kon tabata traha barku di bela di palu.

## Tarea 1.

### Kua provèrbio bo konosé for di nabegashon?

Den idioma papiamentu tin diferente provèrbio i dicho ku a surgi for di nabegashon. Por ehèmpel 'Kada barku wanta su bela.' Bo mes por pensa un par mas?

- ◆ Pensa seis provèrbio na hulandes ku bo grupo, ku por lo mémos kuater diferente piesa/parti di barku. Skirbi e provèrbio- i dichonan akí ku e nifikashon aserka.


**Tep 1:** Wak pintura di e barku i e partinan di barku: bo ta mira bela, masta, parti dilanti. Pensa tambe riba bientu i awa/laman.

**Tep 2:** Buska den dikshonario ku palabra di un parti di barku.

**Tep 3:** Buska riba internèt ku: 'sprekwoorden en gezegden + (e parti di barku)'.

### Tarea plus 1. Hasi un turno oral tokante un fragata di marina moderno.

Bo ta haña hopi informashon riba internèt, por ehèmpel riba Wikipedia. Buska ku 'fregat'. Of informá serka Marina Real na Kòrsou!



E mapa di konstrukshon di fragata Alphen

## Lès 3. Arkeologia supmarino: buska Kòrsou su barku noufragá mas konosí

### Meta di siña

- ◆ Bo ta siña kiko ta arkeologia supmarino.
- ◆ Bo ta tende kon a eskavá e barku noufragá Alphen bou di awa.
- ◆ Bo ta siña ku tur herensia bou di awa ta protehá legalmente.



Aki un arkeólogo ta na trabou bou di awa. Kiko ta tur e kosnan ku bo ta mira?

### Konsepto

#### sistema di midi

E sistema di midi ta konsistí di algun punto fiho riba e lugá di eskavashon. Kuné bo por, por ehèmpel, midi tur kuadrángulo ku bo ke koba. Pero tambe e hayasgonan mas importante.

#### artefakto

Un opheto ku hende a traha intenshonalmente pa sirbi komo hèrmèn.

#### airu komprimí

Ora bo ta landa bou di awa pa un tempu largu, bo tin mester di un tanki ku airu komprimí pa por hala rosea. Den e tanki di sambuyá tin un meskla di prinsipalmente nitrógeno i tambe oksígeno.

#### liña básiko

E liña di midi mas importante den bo sistema di midi.

#### pos di tèst

Un buraku chikitu i firkant ku ta koba pa tèst si e área ta interesante pa un eskavashon arkeológico.

#### kòmprèser

Un aparato ku ta komprimí airu te un volúmen 100 x mas chikitu. Ku eseí a hasi e airu disponibel bou di preshon mas haltu.

#### vákum

Un espasio sin supstansia i sin preshon.

#### kontorno

Liña eksterno di un figura.

#### konservá

Material bieu manera kueru i heru por konservá. Konservashon ta detené e proceso di deskomposishon. Asina e materialnan ta mantené nan forma.


## Buska bou di awa

Den e último lès akí nos ta bai en buska di e barku noufragá Alphen. Un kos sí: kon bo ta hasi haña restunan di un barku drumí den fondo di laman? Hendenan manera Jacques-Yves Cousteau a deskubrí den siglo 20 kon bo por landa bou di awa. Nan a inventá un tanki ku **airu komprimí** i un supmáriño (robòt). Ku eseí nos a bai deskubrí di tur un poko den fondo di laman!

## Arkeología supmáriño

Podisé bo por a yega di tende di **arkeología**. Esei ta e siensiá ku ta studia pasado di hende. Pero por tin marka di hende drumí bou di awa tambe. Barkunan ku a senk i tambe kasnan inundá por ehémpel. Si e materialnan akí a resultá bou di santu, hopi biahá nan a keda bon wardá. **Arkeología supmáriño ta investigá marka humano ku di un óf otro manera a resultá bou di awa.**

**Djis pa sa:** Bo no tin mag di eskavá un barku noufragá kon ku ta asina. **Hasta no ta pèrmiti di bai ku niun artefakto lòs i bieu for di fondo di laman!** Un barku noufragá mas bieu ku 100 aña ta pertenesé semper na herensiá kultural! E herensiá ei ta legalmente protehá ku tratadonan international kontra destrukshon i ladronisia.



## Estudio di arkeología supmáriño

Ami ta Cimberly. Mi ta studia arkeología ku arkeología supmáriño como spesialisashon. Un profeshon tremendo! Pasobra mi por kombiná sambuyamentu ku hasi investigashon di pasado di Kòrsou! Un barku noufragá mi ta haña mashá fasinante pa investigá. Tin biahá ainda tin tur sorto di artíkuло personal di e tempu ei den dje. Anto eseinan yùist ta e detayenan ku nos no por saka for di kuadro óf buki/obra di e tempu ei! Kisas ta un estudio pa bo tambe?



Barku noufragá den fondo di laman

## E restunan di Alphen ta eksistí ainda?

E barku noufragá Alphen ta pertenesé na herensiá kultural di Kòrsou. Pa e motibu ei Wil Nagelkerken mester a pidi **pèrmit** promé ku e por a kuminsá ku eskavashon. Turesten e tabatin preokupashon grandi pa e barku noufragá. Pasobra Alphen a eksplotá i senk den Bahia Santa Ana na Grote Werf na Scharloo. Pero **resientemente a draga e parti nabegabel den Bahia Santa Ana** pa e barkunan grandi! Ademas e chapaletanan fuerte di e barkunan akí ta bòltu e santu den fondo, ku tur loke tin den dje. Ademas tabata bini mas i mas **sambuyadó/bushi deportivo**. Hopi biahá nan tabata bai ku opheto bieu for di fondo di laman. I naturalmente ainda tin e **putrimentu comun** di e material bieu! Lo a sobra algu di Alphen?



E barku noufragá Alphen ta drumí meimeí di Bahia Santa Ana dilanti di Grote Werf di Scharloo



**Barkunan di laman tin chapaleta enorme.** E chapaletanan ta pusha e barku manda dilanti den awa. Fásilmente e chapaleta por chupa un sambuyadó bou di awa! Pues tin peliger di morto pa sambuyá den Bahia Santa Ana! Aki bo por sambuyá solamente ku pèrmit di Curaçao Port Authority (CPA). Meskos ku na Megapier!


## Eksplorashon bou di awa

Porfin e tim di Nagelkerken por a kuminsá ku e eksplorashon bou di awa. Na un **profundidat di kasi 20 meter** e tim a dal den material. Na **70 meter for di waf di Grote Werf** tabatin un **konsentrashon** remarkabel di **artefakto**. Figurá bo, 11 kayon tabata sali for di den lodo!

Den fondo di laman e tim a klabá un liña di midi di 130 meter. Esaki a bira **e liña básiko** di e eskavashon. E liña básiko tabata kana paralèl ku e waf. Kuné sambuyadónan por a midi e hayasgonan den fondo i **bolbe haña nan despues**.

## Pos di tèst bou di awa

For di **posnan di tèst** a resultá ku e **fondo tabata konsistí di piedra (di koral) i lodo**. Un kapa di mas ku dos meter diki! Ariba den e kapa tabatin hopi material for di siglo 20 i 19. Pero bou di eseí e tim a haña hopi material pretu. E tabata parse palu kimá i putrí. Lo ta e restunan di Alphen?



### Eskavashon bou di awa

Den e aña ku a sigui e trabou mes a kuminsá. **For di e liña básiko a marka un sistema di midi den fondo di laman.** E sistema di midi akí tabata konsistí di meternan kuadrángulo ku un propio number. Asina e tim tabata sa presis for di kua kuadrángulo e artefaktonan tabata bini. E kobamentu por a kuminsá. Awor ta kon bo ta hasi eseí bou di awa? Bou di awa bo no por koba saka piedra i lodo ku skòp! E solushon tabata un **airlift**. Ku e **airlift** e sabuyadónan por a kolekshoná e artefaktonan di nan kuadrángulo i hinka nan den un saku. Bou di awa ademas tabata traha **pintura** riba bòrchinan di plèstik. Tabata **saka potrèt** di e hayasgonan di mas importante.

### Koba ku airlift

E airlift ta traha de fatto manera un **stöfzüiger bou di awa**. Un **kòmprèsor** riba waf ta pòmp airu komprimí dor di un slan largu. E slan ta konektá na un pipa PVC. E sambuyadó ta tene e pipa na e pos. E airu komprimí ta skapa for di e pipa bai ariba. Esei ta pèrkurá pa un **vákum** na parti habrí di e pipa. **E vákum akí ta chupa saka awa ku santu i piedra chikitu for di e pos.** Ora un artefakto bira visibel, e sambuyadó ta pusha e airlift un banda un ratu. Fásil!



## Investigashon riba awa

Riba awa tabata hawa tur hayasgo dianan largu **den awa dushi**. Asina bo ta saka e salu for di e ophetonan. Seguidamente tabata limpia e artefaktonan. Kada opheto tabata haña un number. Tabata konta, determiná, pisa, deskribí i saka potrèt di tur kos!



Tur hayasgo di un pos di 1m<sup>2</sup>. Bo ta mira material di konstrukshon, serámika, kueru, glas, metal, palu i wesu di animal.



Den e kapa mas abou tambe a haña rikla di skalchi i poron di siglo 19 i 20. Ra ra, kon por ta?



Plachi di koper



Klabu



Pida pida kabuya



Palu kimá



Katròl pa un kabuya




Un anker di Alphen

## E sistema di midi bou di awa

Aki bo ta mira e konsentrashon di hayasgo den e sistema di midi. Bo ta mira e **liña básiko** entre 18 i 36 meter. E **di dos liña di midi ta pará vertical riba dje**. Ku e liñanan akí tabata marka hòki firkant di 1 m<sup>2</sup>. E hòki pretu abou ta por ehèmpel 25/06. Ke men: e kuadrángulo ta ubiká na 25 meter riba e liña básiko i 6 meter riba e liña vertical.

Den e kuadrángulonan pretu i strepiá a eskavá artefakto. E hòkinan ku punto punto no tabatin artefakto. E hòkinan bashí no a eskavá òf a eskavá despues. Abo ta mira **e kontornonan** di e barku den e sistema di midi?



E sistema di midi i e kuadrángulonan eskavá

## Bèrdat ta Alphen?

Despues di un par di aña e tim a hasi algun shen ora di sabuyá bai e barku noufragá. Míles di artefakto nan a saka riba awa! Wil Nagelkerken a analisá **tur e informashonnan di e eskavashon**. El a mira un **konsentrashon kla di material den un área di un 20 meter hanchu asina**. Den e konsentrashon tabatin hopi pida palu putrí i kimá i kabuya. Tambe tabatin hopi fragmento di plachi di koper i míles di klabu! E kayonnan i bala di kayon a resultá di ta plamá riba un área muchu mas grandi. Esei ta lóxico sí, como ku dor di eksploshon di e barku nan a zuai bai! Pa kòrtiku, no a haña un bòrchi ku e nòmber 'Alphen' riba dje sí entre tur e materialnan, pero pa e tim no tabatin duda. **Nan a haña e restunan di Alphen!**



**Ta riba barku di guera so tabata usa plachi di koper, for di 1761.** Tabata klabu e plachinan di koper kontra parti abou di e barku, pues bou di e liña di awa. E koper ei tabata protehá e palu **kontra bichi di palu** ku tabata kome e palu di eik karu!

## Artíkulonan personal di e tripulashon

Den e restunan di e barku noufragá a haña tambe artíkulo di e tripulashon: rikla di **tayó, wea, skalchi, kòpi i bòter**. Pero tambe **kuchara, martin di palu, moneda, kabes di pipa pa huma i hasta sapatu di kueru!** Rònt di hòki 25/06 a haña hopi tayó i skalchi di un **sèrvis di porselana** karu. Probablemente e sèrvis akí tabata pará un tempu den kashi di un kapitan òf ofisial! Ta nan kambernan tabata situá den parti patras di e barku, ku a senk algun dia despues.



Solé di sapatu di kueru for di eskavashon di Alphen



E sèrvis 'creamware' for di Inglaterra tabata mashá popular na Europa rònt di 1778




Esaki ta sèrvis 'pearlware' for di Inglaterra, den lat di siglo 18



A haña algun shen kabes di pipa. Pasobra den e tempu ei kasi tur hende tabata huma tabaku!

## Rekuerdonan di eskavashon di Alphen



Theo van der Giessen ku un kayon eskavá di Alphen

Theo van der Giessen tabata un di e lidernan di e eskavashon di Alphen. Tambe e tabata un di e sambuyadónan. E ta konta kon tabata pa eskavá bou di awa:

*"Traha bou di awa ta mashá fèrfelu! Ku e tanki di sambuyá un sambuyadó por keda un ora so bou di awa. Despues airu ta kaba! Ademas bo tin mester di tempu pa landa pokopoko bai bèk ariba. Pasobra dor di kambio den e preshon di awa bo por bira hopi malu!"*

*Su siguiente dia bo ta bolbe bai na bo pos bou di awa. Pero pa motibu di e koriente i nabegashon, e pos a yena ku lodo atrobe pa un parti! Hopi trabou èkstra pues, miéntras bo tin asina tiki tempu bou di awa! Tambe a yega di sosodé ku bo tabata abou i bo ta haña un atvertensia ku un barku grandi tabata bini. E or'ei bo mester a hasi pa bo sali for di awa! Nos tabata haña e atvertensia ei via e kòmprèsion pa e airlift: e persona na waf tabata sera suministro di airu di e airlift. Debesenkuando ta nèt na tempu nos por a landa kita bai!"*

## Protekshon di herensia kultural

Restunan di e fragata Alphen ta pertenesé na **herensia kultural di Kòrsou**. Pasobra e barku noufragá ta konta un parti importante di historia di Kòrsou! Lamentablemente e lugá den Bahia Santa Ana mes, kaminda e restunan di Alphen ta den fondo di laman, **(ainda) no ta legalmente protehá**. P'esei ta eksistí e riesgo ku un barku ta tira su anker presis den e restunan. Of podisé ta draga e parti nabegabel den futuro un biaha mas. Esei lo por hasi bastante daño na e restunan!

### Bai kuné òf laga para?

Bon notisia ta ku a saka hopi bòter i otro artefakto tòg sin daño for di e restunan. **Pero salu di laman ta diffísil pa eliminá for di e materialnan**. Glas por ehèmpel hopi biaha ta kuminsá kaska despues di un par di aña. Palu, kueru i heru mester **konservá** spesialmente. Sino nan ta kai pokopoko for di otro! E mihó kaminda pa warda un barku noufragá ku su karga, ta den fondo di laman mes. Kaminda el a drumi tur e tempu!



E bòter bieu akí ta kaska kibra dor di e salu den e glas



E bala di kayon chikitu akí ta kai na pida pida for di otro



Dos kayon di heru bashá ta haña un **tratamento elektrolítiko**.  
E tratamento akí ta trèk e salu for di e heru.  
E tratamento ta dura mas ku un aña!



E kayon di heru bashá akí ta konservá  
ku e tratamento elektrolítiko

## Tratado importante pa protekshon di herensia kultural bou di awa

1. **E tratado di UNESCO pa protekshon di Herensia kultural bou di awa** (2001). E tratado internashonal akí mester kombatí sakeo i destrukshon. Tambe e ke hasi hende konsiente di e importansia di nos herensia kultural bou di awa.

2. **UNCLOS Tratado derecho di laman di Nashonnan Uní** (1986). Akiden tin derechi i deber di paisnan pa uso di oséanonan. Esei ta inkluso e herensia den awa.

3. **Lei di maneho marítimo di Kòrsou** (Artíkulo 30-31) ta válido pa lugánan di hayasgo den laman di Kòrsou.

## Bo ke sa mas?

**M**Hopi di e hayasgonan di eskavashon di e fragata Alphen bo por mira den Museo Marítimo Kòrsou!

Bo tambe ke bira arkeólogo submarino? Arkeología submarina ta un spesialisashon denter di e estudio Arkeología. Bo por sigui e estudio ei den hopi pais. Na Hulanda por ehèmpel, na un kantidat di universitat òf na e Estudio HBO di Saxon. Pero naturalmente bo mester tin bo diploma di sambuyá kaba!

**T**a parse bo leuk pa mira e material eskavá di fragata Alphen di hopi serka? Por! Tur aña ku Cura Doet bo por yuda NAAM ku elaborashon di artefaktonan di Alphen!

Riba wèpsait di e programa hubenil hulandes '*Het Klokhuis*' bo ta haña vidio informativo tokante eskavashon arkeológico di un barku noufragá i e tratamentu di artefaktonan ku a haña. Buska ku '*scheepsarcheologie*'.

## Tarea 1.

**Kues tokante e barku noufragá Alphen i arkeología submarino!**

Esun ku tin mayoria pregunta tokante e barku noufragá Alphen bon, ta e ganadó!

**Tarea plùs 2. Turno oral òf relato tokante tratamentu elektrolítiko di artefakto di heru.**

Buska den tim di dos riba internèt kiko e tratamentu di artefakto di heru akí ta enserá.

## Lès 4. Ekskurshon pa Museo Marítimo Kòrsou

**Bo klas di skol por hasi un bishita na Museo Marítimo Kòrsou na Scharloo.**

Aki por mira hopi material di eskavashon di fragata Alphen!

Ademas bo ta serka di e sitio kaminda Alphen a eksplotá na 1778 i kaminda e barku noufragá ta awor den fondo di Bahia Santa Ana.

**Ta parse bo leuk pa mira material eskavá di fragata Alphen di hopi serka?**

Por!

Tur aña ku Cura Doet bo por yuda arkeólogonan na NAAM ku determinashon di artefaktonan di Alphen!

## Literatura

Gregory, D. & Manders, M. (eds) (2015), *Best practices for locating, surveying, assessing, monitoring and preserving underwater archaeological sites, SASMAP Guideline Manual 2* (pdf).

Lier, Bas van, en Braamhorst, Jan (1996), *Het VOC-schip 'De Halve Maan'*, Uitgeverij Ploegsma, Amsterdam.

Maarleveld, T.J., Guérin, U., Egger, B. (2013), *Manual for Activities directed at Underwater Cultural Heritage. Guidelines to the Annex of the UNESCO 2001 Convention* (pdf).

Manders, M. & Gregory, D. (eds) (2015), *Guidelines to the process of underwater archaeological research, SASMAP Guideline Manual 1* (pdf).

Nagelkerken, W. (2009), 'De Noodlottige Geschiedenis van het Hollandse fregat Alphen. Geëxplodeerd en gezonken in 1778 in de haven van Curaçao'. STIMANA Marine Archaeological Series No.3. Curaçao Maritime Museum.

Nagelkerken, W. (1995), *1995-opgraving van het Hollandse Fregat 'Alphen' geëxplodeerd in Curaçao in 1778*. AAINA, Curaçao.

Nagelkerken, W. (1990), *Opgraving van het Hollandse Fregat 'Alphen' geëxplodeerd in Curaçao in 1778*. AAINA, Curaçao.

Schellekens, J., ed. (2011), *De Rijke geschiedenis van Curaçao. De zee, handel en scheepvaart*. Curaçao.

Veltkamp, J. (2014), *Het journaal van Joannes Veltkamp (1759-1764)*. Red. Rosanna Baars. Wbooks. Het Scheepvaartmuseum, Amsterdam.

### Internet:

[http://www.curacaomaritime.com/files/stimana\\_brochure\\_complete\\_1311883387.pdf](http://www.curacaomaritime.com/files/stimana_brochure_complete_1311883387.pdf)

<http://www.vocsite.nl/geschiedenis/functies.html>

<https://www.hetklokhuis.nl/>

## Kolofon

### Teksto i koordinashon di proyekto:

Wynne Minkes

### Diseño gráfico:

Ariadne Faries

### Ilustrashon:

Ilse Koster (Island Illustrations),  
a ménos otro menshoná

### Tradukshon na Papiamentu:

Merly Augusta

### Potrèt:

Wynne Minkes, a ménos otro menshoná

### Redakshon:

Esther Mites (D7 archeologie).

### Sosten digital:

Rianne Hellings (Kuki+Ko)

### Finansiamentu:

UNESCO,  
Prins Bernhard Cultuurfonds Caribisch Gebied  
en NAAM.

© Stichting NAAM

## Danki na

François van der Hoeven (Stimana)

Wil Nagelkerken (biólogo marítimo i arkeólogo)

Martijn Manders (arkeólogo supmarino)

Cimberly Symister (Saxion Deventer)

Theo van der Giessen (Stimana, Uniek Curaçao)

Thamara Moreno-Vervuur (Curaçao Maritime Museum)

Marja Goud (Scheepvaartmuseum Amsterdam)

Bart Lahr (Scheepvaartmuseum Amsterdam)

## Responsabilisashon

### Promé página

Potrèt di arkeologia supmarino ta di Dennis Knepper. Potrèt for di e STIMANA brochure “*Stichting Mariene Archeologie Nederlandse Antillen*”.

#### Lès 1. Kon e fragata Alphen a bira un barku noufragá

Prenchi di koló 'Fragata Alphen ta eksplotá den haf di Kòrsou'. Prenchi di Wil Nagelkerken.

Kuadro di David Kleyne, 1789. ‘*Het fregatschip "Triton" en andere schepen*’. Kolekshon Het Scheepvaartmuseum, Amsterdam (inventarisnummer A.3238)

Trahadó di prenchi C. F. Bendorp, segun pintura di P.M. la Cave: “Gevecht tussen Hoekerschip Vrouw Machtelyna en Engels fregat Diamant voor de haven van Curaçao, 1782”. E prenchinan ta tumá for di propiedat públiko <http://hdl.handle.net/10934/RM0001.COLLECT.497803>

#### Lès 2. Fragata Alphen: un barku di bela di palu ku hopi tripulashon

Dr. Wil Nagelkerken ta biólogo marino i arkeólogo supmarino. El a organisá eskavashon di fragata Alphen di 1987 te 2002. E guia di lès akí ta skirbi ku informashon for di su buki- i rapòrtnan.

Barku fragata moderno di marina den region di Karibe. (Potrèt Marina Real).

Fragata belando, di di dos mitar di siglo 18. Kuadro propiedat privá.

Mapa di konstrukshon di fragata Alphen. For di e kolekshon di Scheepvaartmuseum, Amsterdam. Inventarisnummer (vrlnr14747\_OAIIB130003). ‘*Algemeen plan met lijnentekening van een schip van 36 stukken, 1762 door Willem Lodewijk van Genth*’.

Prenchi pretu ku blanku di bataya naval na Kòrsou dor di K.F. Bendorp. Den Museo Marítimo Kòrsou.

Diameter di e fragata Lutine ta pintá pa Gerald De Weerdt. Ta rekonstrukshon di e fragata 'Lutine' ku a konstruí na 1779. E barku a noufragá na 1799 ku tur hende i un tesoro di oro na bordo, na e isla Terschelling na Hulanda.

Potrèt di e tualèt den galeon ta saká riba réplika di 'De Batavia' riba Bataviawerf den Lelystad.

Potrèt di e figura di proa ku un leon ta saká riba réplika di 'De Amsterdam' den Scheepvaartmuseum Amsterdam.

Pintura di *kielhalen* ta basá riba pintura di Joannes Veltkamp for di e buki “*Het journaal van Joannes Veltkamp (1759-1764)*” (elaborá pa W. Minkes)

#### Lès 3. Arkeología supmarino: buska Kòrsou su barku noufragá mas konosí

E potrètnan di arkeología supmarino ta bini for di e foyeto di STIMANA “*Stichting Mariene Archeologie Nederlandse Antillen*” (potrèt Dennis Knepper). E potrèt di Theo van der Giessen tambe. Potrèt di tratamentu elektrolítiko ta di Wil Nagelkerken.

Potrèt di Cimberly Symister (Cimberly Symister).

Sistema di midi di eksplorashon di sitio di Alphen na 1987 ta bini di e Rapòrt 1990 di Nagelkerken (fig. 6).

E sistema di midi i e konsentrashon di hayaso di eskavashon di Alphen te 1996 ta bini for di Rapòrt 1995 di Nagelkerken (fig. 2).

Tayó di sèrvis ‘creamware’ i sèrvis ‘pearlware’ ta potrèt di W. Nagelkerken (Rapòrt 1999).

E *airlift* bou di awa ta un potrèt di Rijksdienst voor het Cultureel Erfgoed (RK17\_MP\_11\_9).

E hayasgonan arkeológico di eskavashonnan di Alphen ta wardá den Museo Marítimo Kòrsou i na NAAM.